

Ministère de l'Agriculture, de la Viticulture et du Développement rural, 8
Référence: 270/22
25 AVR. 2022
A traiter par:
Copie à:

Här Fernand Etgen
President vun der Deputéierte Chamber
19, um Krautmaart
L-1728 Lëtzebuerg

Lëtzebuerg, den 22. Abrëll 2022

Här President,

esou wéi d'Chambersreglement et virgesäit, biede mir Iech, dës parlamentaresch Fro un den Här Energieminister an un den Här Landwirtschaftsminister weiderzeleeden.

Säit Ufank vum Joer 2019 setzt d'Lëtzebuenger Regierung massiv op d'Fërdere vum Biokraaftstoff. An deem Kontext gouf den E10-Bensinn agefouert, deen en Undeel vu Biokraaftstoff vun 10 Prozent virweist. Parallel dozou ginn ëmmer méi Stëmme haart, déi d'Fërdere vu Biokraaftstoff ganz kritesch gesinn. Verrieder vum Pik (Potsdamer Institut für Klimaforschung) kritiséiere virun allem, datt e groussen Deel vun der Fruucht fir d'Produzéiere vu Biokraaftstoff benotzt gëtt, amplaz datt dës fir déi mënschlech Ernierung zur Verfügung gestallt gëtt. Grad am Zesammenhang mam Krich an der Ukrain an dem Risiko vun enger Liewensmëttelknappheet stellt sech déi pertinent Fro, ob et iwwerhaupt nach ze verrieden ass, Fruucht fir d'Hierstelle vu Biokraaftstoff ze notzen, amplaz si fir déi prekär Ernierungssituatioun an Europa an/oder Drëttlänner ze notzen.

An deem Kontext hätte mir folgend Froen un d'Regierung:

1. Ass sech d'Regierung där uewe beschriwwener Problematik vum Notze vu Fruucht fir d'Produzéiere vu Biokraaftstoff am Kontext vun enger méiglecher Liewensmëttelknappheet bewusst? Wa jo, wéi eng Schlussfolgerungen zitt d'Regierung aus dëser Erkenntnis?
2. Gedenkt d'Regierung an deem Sënn ze legiferéieren, datt zu Lëtzebuerg Fruucht an Zukunft net méi fir d'Hierstelle vu Biokraaftstoff genotzt däerf ginn?

Mat déiwem Respekt,



Fred Keup
Deputéierten



Jeff Engelen
Deputéierten



LE GOUVERNEMENT
DU GRAND-DUCHÉ DE LUXEMBOURG

Ministère de l'Énergie et de
l'Aménagement du territoire

Département de l'énergie

**Äntwert vum Minister fir Energie a vum Minister fir Landwirtschaft, Wäibau a ländlech Entwécklung
op d'parlamentaresch Fro n°6090 vum 22. Abrëll 2022 vun den honorabelen Deputéierte Fred Keup a
Jeff Engelen iwwert Biokraftstoffer**

**1. Ass sech d'Regierung där uewe beschriwwener Problematik vum Notze vu Fruucht fir d'Produzéiere
vu Biokraafstoff am Kontext vun enger méiglecher Liewensmëttelknappheet bewosst? Wa jo, wéi eng
Schlussfolgerungen zitt d'Regierung aus dëser Erkenntnis?**

Schonns an der Äntwert op d'parlamentaresch Fro n°3943 vum 25. Mäerz 2021 vun dem honorabelen
Deputéierte Mars Di Bartolomeo iwwert Biokraftstoffer ass déi Thematik detailléiert beliicht ginn.

D'Direktiv 2018/2001/UE gesäit vir, dass Biokraftstoffer aus der sougenannter éischer Generatioun, déi
am Wesentleche fir den Zweck vun der Energieproduktioun op Agrarland ugebaut ginn, maximal 7% vum
Endenergieverbrauch am Stroossen- a Schinneverkéier däerfen ausmaachen.

D'Regierung huet schonns am Dezember 2019 iwwert d'Accisegesetz festgehalten, dass den Undeel vun
deene Biokraftstoffer net méi wéi 5% däerf ausmaachen a läit also däitlech méi niddereg wéi den Undeel,
dee vun der Direktiv virgesinn ass.

**2. Gedenkt d'Regierung an deem Sënn ze legiferéieren, datt zu Lëtzebuerg Fruucht an Zukunft net méi
fir d'Hierstelle vu Biokraafstoff genotzt däerf ginn?**

Wéinst hirem Ëmweltimpakt ënnersträicht d'Direktiv 2018/2001/UE datt den Undeel vun den uewe
genannte Biokraftstoffer, déi och e grouse Risiko duerstelle fir indirekt Verännerunge vun der Land- a
Flächennotzung vun 2024 un lues a lues muss reduzéiert gi bis hin op 0% am Joer 2030.

Den Undeel vu deene Biokraftstoffer gëtt dann och weiderhin déif gehalen a wäert an der Zukunft iwwert
d'Accisegesetz kontinuéierlech an am Aklang mat der Direktiv erofgesat ginn.

Lëtzebuerg, den 30. Mee 2022

(s.) Claude Turmes
Minister fir Energie